



Här Claude Wiseler

President vun der Deputéierte Chamber

19, um Krautmaart

L-1728 Lëtzebuerg

Lëtzebuerg, den 28. Januar 2026

Här President,

esou wéi d'Chambersreglement et virgesäit, bieden echlech, dës parlamentaresch Fro un den Här  
Educationsminister weiderzeleeden.

De 15. Januar 2026 huet d'Elterevereinigung vun der Primärschoul zu Dummeldeng eng  
ëffentlech Petitioun lancéiert, an där et ënner anerem heescht:

*« Nous, parents des enfants fréquentant l'école fondamentale de Dommeldange, nous  
adressons à vous car la situation actuelle au sein de notre école n'est plus acceptable.*

*Les enfants et les enseignants sont quotidiennement exposés à la violence, à des  
comportements agressifs et à de graves perturbations. La peur et l'instabilité font désormais  
partie du quotidien scolaire. Il ne s'agit ni d'un problème temporaire ni d'un cas isolé, mais d'un  
problème structurel et systémique persistant, qui continue d'être toléré.*

*Cette situation porte atteinte aux droits fondamentaux des enfants, notamment à leur droit à  
l'intégrité physique et psychologique ainsi qu'à l'éducation. Les cours sont régulièrement  
perturbés, entraînant un retard scolaire pour les élèves, et beaucoup subissent une détresse  
psychologique importante en étant témoins ou victimes de violence. Parallèlement, les  
enseignants sont soumis à une pression constante et ne disposent pas de moyens efficaces  
pour réagir de manière appropriée.*

*Le personnel enseignant est engagé et travaille avec un dévouement total, mais il a besoin des  
moyens et des ressources nécessaires. Les enseignants respectent les procédures en vigueur,  
signalent les incidents et agissent dans le cadre d'une marge de manœuvre très limitée. Même  
des comportements graves restent souvent sans conséquences notables. Cela est  
profondément alarmant. Les autorités sont pleinement conscientes de ces difficultés, mais les  
causes profondes demeurent non traitées. »*

A weider: *« Une intervention de crise de la police a récemment eu lieu à l'école. Même si une  
telle intervention peut être nécessaire dans certains cas, la question se pose de savoir si cela  
est destiné à devenir la nouvelle normalité dans les écoles luxembourgeoises. »*

An deem Kontext hunn ech folgend Froen un den Här Minister:

- 1) Kann den Här Minister eis am Detail erklären, wat an der Primärschoul zu  
Dummeldeng virgefall ass, fir datt et zu esou enger alarméierender Petitioun komm  
ass?
- 2) Aus wéi enge konkrete Grënn koom et zu enger Interventioun vun der Police an dëser  
Schoul?
- 3) Iwwer wéi eng Informatiounen verfuegt de Ministère, wat d'Zuel u Personal an dëser  
Schoul ugeet? Kann een hei vun engem Manktem u Personal ausgoen?
- 4) Wéi gedenkt de Ministère déi fir d'Elteren inakzeptabel Situatioun ze verbessern?

- 5) Sinn dem Ministère änlech Virfäll an anere Primärschoule vum Land bekannt? Wa jo, wat gedenkt de Ministère an de betreffende Fäll ze ënnerhuelen?

Mat déiwem Respekt,

A handwritten signature in blue ink, consisting of a stylized 'F' followed by the name 'Keup'.

Fred Keup  
Deputéierten



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro  
Nr. 3549 vum honorabelen Deputéierte Fred Keup**

**1) Kann den Här Minister eis am Detail erklären, wat an der Primärschoul zu Dummeldeng virgefall ass, fir datt et zu esou enger alarméierender Petitioun komm ass?**

Aus Grënn vun der Confidentialitéit an der Protektioun vun de betraffene Mineure ka mäi Ministère keng Detailer zu spezifeschem Eenzelfall kommunizéieren. Et kann awer festgehalen ginn, datt vereenzelt Incidenten, an déi virun allem zwee Kanner mat Verhalensopfällegkeeten implizéiert waren, an der Primärschoul zu Dummeldeng zu der Petitioun gefouert hunn.

**2) Aus wéi enge konkrete Grënn koum et zu enger Interventioun vun der Police an dëser Schoul?**

D'Interventioun vun der Police ass an dem ënner 1) beschriwwene Kader geschitt.

**3) Iwwer wéi eng Informatiounen verfuegt de Ministère, wat d'Zuel u Personal an dëser Schoul ugeet? Kann een hei vun engem Manktem u Personal ausgoen?**

Déi lokal a regional Acteuren hunn an dësem Zesummenhang eng Rei vu koordinéierten a verstärkten Mesuren an d'Weeër geleet, fir eng adequat Betreierung vun de Schüler ze garantéieren, enger Eskalatioun vu Konfliktsituatiounen entgéintzewierken an erëm e nohaltege rouegt a séchert Schouklime hierzestellen.

Aktuell goufen ënner anerem folgend Mesuren ëmgesat: Dat ganz Léier- an Erzieungspersonal hëlt u Formatiounen fir Deseskalationstechniken a Klassemanagement deel. Bei all Tëscheffall am Zesummenhang mat Aggressioun, Gewalt oder enger schwéierער Stéierung vum Schoulalldag ginn d'Elteren direkt a proaktiv informéiert. Zousätzlech gouf e schrëftlechen, detailléierten Aktiounsplang ausgeschafft, an deem weider Schrëtt festgehalen sinn, fir d'Sécherheet an e funktionellt Léierëmfeld dauerhaft ze garantéieren.

An der Schoul ass systematesch e qualifizéierte Schoulpsycholog present, deem d'Schüler psycho-emotional begleet an déi pädagogesch Ekippen an der Analys an an der Gestoun vu sensibelen Situatiounen ënnerstëtzt. Zousätzlech gouf eng Educatrice graduée zur Verfügung gestallt, déi prioritär de sozio-emotionale Suivi vun de betraffene Kanner iwwerhëlt. Ausserdeem goufen d'Stonnen, déi fir d'Interventioun vun engem Instituteur spécialisé dans la scolarisation des élèves à besoins éducatifs spécifiques (I-EBS) virgesi waren, bedéngt duerch d'Erausforderungen, déi sech weinst der sozio-ekonomescher a sozio-kultureller Zesummesetzung vun der Schoulpopulatioun erginn, erhéicht. Zanter dem Dezember 2024 gëtt den I-EBS duerch een Assistant pour élèves à besoins éducatifs spécifiques (A-EBS) ënnerstëtzt, dëst fir déi deeglech Begleitung vu Kanner mat besonneschem Ënnerstëtzungbedarf weider ze stäerken.

Donieft goufen en zousätzleche Vollzäitenseignantsposten, deem eng spezifesch pädagogesch Ekip nohaltege ënnerstëtzt, an ee weideren zousätzlechen Enseignantsposte geschaf, deem zwee Deeg pro Woch flexibel jee no identifizierte Besoinen agesat ka ginn.

Et ass wichteg ze betounen, datt de Schoulcomité an dat betraffent Léierpersonal an engem permanenten Austausch mat der Regionaldirektioun stoungen. D'Situatioun gouf reegelméisseg evaluéiert, fir op eventuell bestoend oder nei optriedend Problemer kënnen ze reagéieren.

**4) Wéi gedenkt de Ministère déi fir d'Elteren inakzeptabel Situatioun ze verbesseren?**

Well um lokalen an um regionalen Niveau schonn eng verstärkt Prise en charge vun de betraffene Schüler ëmgesat gouf, ouni datt dëst zu enger nohalteger Entlaaschtung vun der Situatioun geféiert huet, ginn aktuell weider strukturell Moosnamen ageleet.

Wat déi betraffe Schüler ugeet, ass aktuell eng Offer vu spezialisierter Beschoulung an Ausaarbechtung, esou datt si d'Grondschoul zu Dummeldeng an noer Zukunft wäerte verloossen, fir an engem méi ugepasste Kader encadréiert ze ginn.

Aus Grënn vun der Confidentialitéit vun den individuellen Dossierer an der Protektioun vun de Mineure kann de Ministère keng detailléiert Informatiounen zu eenzelne Situatiounen kommunizéieren.

**5) Sinn dem Ministère änlech Virfäll an anere Primärschoule vum Land bekannt? Wa jo, wat gedenkt de Ministère an de betreffende Fäll ze ënnerhuelen?**

De Ministère ass aktuell an engem Dialogprozess engagéiert mat wichtege Schoulpartner, fir sech e genau Bild vun der aktueller Situatioun ze maachen. D'Conclusiounen aus dësem Prozess wäerten an deene kommende Méint virgestallt ginn.

Lëtzebuerg, den 3. Mäerz 2026

De Minister fir Educatioun,  
Kanner a Jugend

(s.) Claude MEISCH